

Na osnovu člana 70. stav 1. tačka 2. Statuta Općine Vogošća („Službene novine Kantona Sarajevo“, broj 27/14 - Prečišćen tekst i 14/15) i člana 11. stav 1. Odluke o priznanjima Općine Vogošća, („Službene novine Kantona Sarajevo“, broj: 9/14), Općinsko vijeće Vogošća na sjednici održanoj 30.05. 2019. godine donijelo je

O D L U K U

O DODJELI PRIZNANJA OPĆINE VOGOŠĆA ZA 2019. GODINU

Član 1.

Ovom Odlukom Općinsko vijeće Vogošća dodjeljuje priznanja Općine Vogošća u povodu 24. juna Dana Općine Vogošća u skladu sa kriterijima i mjerilima za dodjelu općinskih priznanja.

Član 2.

Općinska priznanja u 2019. godini dodjeljuju se:

1. „Zlatni grb sa plaketom Općine Vogošća” dodjeljuje se:

1. Atif Džafo – posthumno

2. „Plaketa Humanista godine Općine Vogošća“ dodjeljuje se:

1. Faruk Duran

3. „Zahvalnica Općine Vogošća” dodjeljuje se:

1. Ilma Cvrk
2. Bakir Mehić – posthumno
3. Ervin Macić
4. Ehlimana Jugo
5. Nihad Mujakić
6. Haris Fazlić
7. Volkswagen d.o.o. Sarajevo
8. Amir Bogilović
9. Edin ef. Mrkulić
10. Haris Čutahija
11. Ernad Šahović

Član 3.

Općinska priznanja iz člana 2. ove Odluke uručuju se na svečanoj sjednici Općinskog vijeća povodom obilježavanja Dana Općine Vogošća.

Član 4.

Ova Odluka stupa na snagu narednog dana od dana objavljivanja u “Službenim novinama Kantona Sarajevo”.

Broj: 01-02-781/19
Vogošća, 30.05.2019. godine



OBRAZLOŽENJE

Pravni osnov za donošenje Odluke o dodjeli priznanja Općine Vogošća za 2019. godinu je:

- član 70. stav 1. tačka 2. Statuta Općine Vogošća („Službene novine Kantona Sarajevo“, broj 27/14 - Prečišćen tekst i 14/15) koji glasi: «Općinsko vijeće donosi Odluke, druge propise i opće akte i daje njihovo tumačenje».
- Član 11. Odluke o priznanjima Općine Vogošća, („Službene novine Kantona Sarajevo“, broj: 9/14) koji glasi: «Odluku o dodjeli priznanja donosi Općinsko vijeće na prijedlog Komisije za odlikovanja i priznanja».

Finansijska sredstva za realizaciju Odluke o priznanjima Općine Vogošća za 2019. godinu planirana su u Budžetu Općine Vogošća.

U skladu sa Odlukom o priznanjima Općine Vogošća, („Službene novine Kantona Sarajevo“, broj: 9/14), Komisija za odlikovanja i priznanja Općinskog vijeća Vogošća je raspisala Javni poziv za predlaganje kandidata za dodjelu priznanja. U predviđenom roku pristiglo je 27 prijedloga od 11 predlagača. Prijedlozi su dobiveni od političkih organizacija, Općinskog načelnika, udruženja, osnovne škole i mjesnih zajednica. Analizirajući sve pristigle prijedloge utvrđeno je da je za ZLATNI GRB SA PLAKETOM OPĆINE VOGOŠĆA bilo 4 (četiri) prijedloga od strane pet predlagača, za HUMANISTU GODINE OPĆINE VOGOŠĆA 3 (tri) prijedloga od strane četiri predlagača, za ZAHVALNICU OPĆINE VOGOŠĆA 20 (dvadeset) prijedloga od strane sedam predlagača i za jedno od tri navedena priznanja 1 (jedan) prijedlog od strane jednog predlagača.

Nakon razmatranja prispjelih prijedloga, Komisija za odlikovanja i priznanja Općinskog vijeća Vogošća

PREDLAŽE ZA „ZLATNI GRB SA PLAKETOM OPĆINE VOGOŠĆA“

1. Atif Džafo – posthumno

- Atif Džafo, rođen je u Varešu 04.03.1945. godine, najveći dio svog života proveo je u Vogošći. Oženjen i otac dvoje djece. U Sarajevu je završio Likovnu akademiju 1968. godine, a nakon toga i Pravni fakultet. Bio je dugogodišnji uposlenik Općine Vogošća, istaknuti pravnik, društveni, politički i kulturni radnik.
- Radio je kao profesor likovne umjetnosti u školama u Bosanskoj Dubici, Vlasenici, Zenici i Ilijašu. Od 1976. godine zaposlen u Opštinskom sekretarijatu za geodetske i urbanističke poslove Opštine Vogošća. Od 1977. godine imenovan je za inspektora za prihode Skupštine opštine Vogošća. Od 1982. godine imenovan je za predsjednika Opštinske komisije za geodetske, urbanističke i imovinsko-pravne poslove Opštine Vogošća. 1984. godine postaje sekretar Opštinskog sekretarijata uprave Opštine Vogošća, a od 1985. do 1989. godine direktor “KOSRC”-a Vogošća. Nakon toga radi kao advokat.
- U toku agresije na BiH bio je pripadnik ARBiH kao pomoćnik komadanta u 126. Ilijaškoj brigadi, a nakon toga pomoćnik komadanta Ratnog vazduhoplovstva ARBiH;
- Od 1996. godine ponovo aktivno radi kao advokat;
- Bio je poslanik u Federalnom parlamentu, član Ustavne komisije, član Zakonodavne komisije i predsjednik Odbora za denacionalizaciju.
- Od 1998. do 2004. godine bio je vijećnik u Općinskom vijeću Vogošća, a od 2000. – 2004. godine obavljao je funkciju Predsjedavajućeg Općinskog vijeća Vogošća;
- 2007. godine napustio je sve društvene i političke funkcije kada je imenovan za notara sa sjedištem u Vogošći, sve do penzionisanja 04.03.2015. godine;
- Nakon penzionisanja postaje vlasnik Agencije za nekretnine.
- Preminuo je 22.04.2019. godine.
- Bio je čovjek koji je imao vremena za svakoga, osmijeh za svakoga i lijepu riječ za svakoga.

KOMISIJA PREDLAŽE ZA „HUMANISTA GODINE OPĆINE VOGOŠĆA“

1. Faruk Duran

- Faruk Duran rođen je 03.01.1983. godine u Sarajevu. Osnovnu školu završio u Vogošći, a potom Srednju muzičku školu i Muzičku akademiju. Dugogodišnji član KUD „Vogošća“ i učesnik je nekoliko regionalnih takmičenja iz oblasti muzike.

- Učestvovao je na velikom broju humanitarnih koncerata i akcija za pomoć bolesnim i socijalno ugroženim građanima.
- 11.01.2018. godine organizovao je humanitarni koncert za „Za Emira srcem“ gdje su se pojavile najveće zvijezde Bosne i Hercegovine, ali i regiona te na taj način dali doprinos u liječenju dječaka Emira Buze, koji je uspješno izliječen nakon niza terapija u Turskoj i sada vodi normalan život sa svojim vršnjacima.

KOMISIJA PREDLAŽE ZA „ZAHVALNICU OPĆINE VOGOŠĆA“

1. Ilma Cvrk

- Ilma Cvrk rođena je 12.07.2004. godine. Trenutno je maturantica Osnovne škole „Izet Šabić“, odličan je učenik i Intenzivno se bavi robotikom i programiranjem već tri godine, te je osvajala prestižna mjesta na takmičenjima. Zna programske jezike C, C++, Python, HTML i Scratch. Pored informatike, svoje interesovanje pokazuje za geografiju, matematiku, fiziku.
- Postigla je mnoge rezultate na slijedećim takmičenjima:
 - 1.mjesto na opštinskom takmičenju učenika osnovnih škola iz nastavnog predmeta geografija 2018/2019
 - 2. mjesto na kantonalnom takmičenju učenika osnovnih škola iz nastavnog predmeta geografija 2018/2019 i plasman na Balkanijadu u Beogradu.
 - 1. mjesto na takmičenju učenika osnovnih škola iz nastavnog predmeta informatike 2017/2018
 - 1. mjesto na Drugom regionalnom takmičenju iz robotike
 - 1. mjesto na Drugom fizičkom kolu iz robotike
 - 1. mjesto na Drugom online kolu iz robotike
 - 2. mjesto na takmičenju učenika osnovnih škola iz nastavnog predmeta matematike 2016/2017
 - 2. mjesto na Javnom natječaju za najbolju priču na temu „Moja domovina u mom snu“ u povodu Dana državnosti Bosne i Hercegovine
 - 3. mjesto na takmičenju učenika osnovnih škola iz nastavnog predmeta matematike 2017/2018
 - 3. mjesto na takmičenju učenika osnovnih škola iz nastavnog predmeta fizika 2017/2018
 - 3. mjesto na takmičenju učenika osnovnih škole iz nastavnog predmeta informatike 2018/2019
 - 1. mjesto u oblasti dramski prikaz na Smotri kulturno-umjetničkog stvaralaštva učenika osnovnih škola
 - 2. mjesto na takmičenju manifestacije Selam, ya Resulallah
 - 1. mjesto iz testa općeg znanja II Džemat Hotonj
 - 1. mjesto na takmičenju literarnih radova posvećenih zemlji Bosni i Hercegovini na obilježavanju 72. godišnjice zasjedanja ZAVNOBIH-a
 - 2. mjesto na likovnom takmičenju mira „Ipil-ipil no Kai“
 - 1. mjesto na mektebskom takmičenju „Upoznaj Poslanika“
 - Najbolji učenik škole 2016/2017. i 2017/2018. školske godine.
- Radi o veoma darovitoj, svestranoj, kreativnoj i veoma uspješnoj učenici koja prema mišljenju njenih nastavnika predstavlja „Kreativni resurs ove zemlje“, a koja je svojim dosadašnjim radom promovisala našu općinu Vogošća.

2. Bakir Mehić - posthumno

- Mehić Bakir rođen je 02.01.1949 godine u Vogošći. Radni vijek proveo je u Općini Vogošća na rukovodećem radnom mjestu. Svojim požrtvovanim radom pokazivao je kako se suočiti sa brojnim izazovima u životu, a posebno nakon Reintegracije Općine Vogošća u sastav Federacije BiH. Radio je u organu uprave - Općini Vogošća i prije rata, a poseban doprinos Općini dao je tokom agresije na BiH, radeći i dolazeći na posao iz Sarajeva na linije razdvajanja. Bila je to Kobilja Glava na više lokacija.
- Bio je veliki humanista i nebrojeno puta je pokazao šta znači bosanski merhamet. Svoju humanost Bakir je ispoljavao i u svakodnevnom životu, ne štedeći sebe u rješavanju svakodnevnih brojnih problema poslije reintegracije općine Vogošća, koji su bili teški, čak i nerješivi. Nakon odlaska u starosnu penziju radeći 40 godina u Općinskom organu, ubrzo se razbolio i napustio nas. Odlaskom našeg Bakira, njegovi brojni prijatelji i poznanici ostali su uskraćeni za osmjeh, koji je uvijek ulijevao nadu u bolje sutra. Na Bakira se uvijek moglo računati, čak i onda kada je bilo teško iznaći neka rješenja. Imao je veliku mudrost i znanje u svojoj struci, svojim optimizmom i saburom, koji je uvijek ispoljavao prema drugim ljudima oko sebe, te nesebičnim zalaganjem, Bakir je ulijevao snagu i povjerenje. Ovom velikom prijatelju i radniku dugujemo sjećanje koje ne blijedi.

3. Ervin Macić

- Macić Ervin je učenik devetog razreda osnovne škole i učenik petog razreda muzičke škole Mladen Pozajić odsjek klavir gdje je ujedno i najbolji učenik. U svom dosadašnjem školovanju ostvario je brojne uspjehe na takmičenjima iz matematike, fizike, informatike. U školskoj 2016/2017. godini kao učenik sedmog razreda osvojio je drugo mjesto na Kantonalnom takmičenju iz matematike. Kao učenik muzičke škole osvojio je drugo mjesto na Federalnom takmičenju odsjek Klavir u svojoj klasi.
- U školskoj 2017/2018. godini kao učenik osmog razreda ostvario je uspjehe iz predmeta matematika i informatika i to:
 - prvo mjesto na Kantonalnom takmičenju iz matematike
 - drugo mjesto na Federalnom takmičenju iz matematike
 - učesće na juniorskoj olimpijadi
 - drugo mjesto u okviru informatičkog takmičenja Kodiranje.
 - prvo mjesto na Kantonalnom takmičenju iz matematike
 - drugo mjesto na Federalnom takmičenju iz matematike
 - peto mjesto na Kantonalnom takmičenju iz fizike
 - prvo mjesto na takmičenju Znanjem gradi BiH za Dan državnosti BiH.
- U okviru takmičenja koje je organizovalo Udruženje matematičara Kantona Sarajevo i Richmons school bio je
 - tri puta drugo mjesto na matematičkim kampovima ljetnji i zimski kamp
 - tri puta prvo mjesto na Općinskom takmičenju iz matematike,
 - dva puta drugo mjesto na Općinskom takmičenju iz fizike.
- Kao vrsnom matematičaru objavljena su mu brojna rješenja zadataka na svjetskim matematičkim stranicama.

4. Ehlimana Jugo

- Ehlimana Jugo je rođena 17.02.1995. godine u Sarajevu. Pohađala je osnovnu školu „Zajko Delić“ na Kobiljoj Glavi koju je završila sa odličnim uspjehom i kao jedan od Ponosa generacije 2009. godine. Svoje srednjoškolsko obrazovanje započela je u sarajevskoj Drugoj gimnaziji, koju također završava sa odličnim uspjehom i sa istim priznanjem. Nakon završetka Druge gimnazije (prirodni smjer), 2013. godine upisala je Mašinski fakultet u Sarajevu. 2016. godine je završila prvi ciklus studija na odsjeku Energetika, procesna tehnika i okolinsko inženjerstvo, smjer: Klimatizacija, grijanje i hlađenje, sa prosjekom ocjena 9,54. Iste godine upisuje master studij na smjeru Procesno inženjerstvo koji okončava 2018. godine sa prosjekom ocjena 10,00, te dobijanjem zvanja Magistra mašinstva. U toku školovanja, bila je demonstrator na predmetima iz oblasti Matematike na Mašinskom fakultetu i dvije godine zaredom je učestvovala na Mašinijadi - regionalnom takmičenju iz nauke i sporta, pri čemu je osvojila drugo (2016. godine) i treće mjesto (2017. godine) iz oblasti Termodinamike. Ehlimana je dobitnica priznanja „Zlatna značka“ Univerziteta u Sarajevu za I ciklus studija na Univerzitetu u Sarajevu, te isto tako dobitnica priznanja Zlatna značka Univerziteta za II ciklus studija na Univerzitetu u Sarajevu.
- Iz prethodnog se vidi nesebičan doprinos našoj zajednici kroz naučni rad i intelektualne vrijednosti Ehlimane. Jednom rječju Ehlimana je ponos naše općine.

5. Nihad Mujakić

- Nihad Mujakić rođen je 15.04.1998. godine u Sarajevu, osnovnu školu završio je u Vogošći te Srednju saobraćajnu školu u Sarajevu. Prve fudbalske korake napravio je u FK Unis iz Vogošće odakle prelazi u školu fudbala Asim Ferhatović Hase, a zatim u akademiju FK Sarajevo. U FK Sarajevo prolazi sve selekcije i postaje standardni prvotimac ovog velikana. Ubrzo ga prepoznaju svjetski klubovi, te tako potpisuje za Belgijski Kortrijk. Prema podacima najuglednijeg fudbalskog portala Transfermarkt Nihad Mujakić je trenutno najskuplji igrač BH Telecom Premijer lige Bosne i Hercegovine. Također Nihad Mujakić prepoznat je i od strane krovne kuće BH fudbala i selektora mlade reprezentacije U 21 Bosne i Hercegovine te postaje standardan reprezentativac, a na pragu je poziva selektora A reprezentacije Bosne i Hercegovine Roberta Prosinečkog. Nihad Mujakić s ponosom ističe da je Vogošćanin te na takav način itekako doprinosi promociji Vogošće i vogošćanskog sporta, što je prepoznala i Komisija za izbor sportiste godine općine Vogošća za 2018. Godinu, te mu dodijelila priznanje sportiste godine za 2018. godinu. Nihad Mujakić je takođe pokazao da je veliki humanista, kroz rad u nevladinom sektoru gdje itekako doprinosi u radu Omladinskog udruženja Tempo.

6. Haris Fazlić

- Haris Fazlić je rođen 14.12.1985.godine u Sarajevu. Osnovnu školu "Mirsad Prnjavorac" završio je u Vogošći da bi potom upisao srednju Zubotehničku školu u Sarajevu.
- Nakon srednje škole upisuje i kao redovan student završava Stomatološki fakultet u Sarajevu. Od 2014. radi kao polivalentni stomatolog u Domu zdravlja Vogošća, pružajući stomatološke usluge svojim sugrađanima. Bavi se karateom od 1998.godine i kroz sve te godine u ovom sportu dolazi do zvanja majstor karatea 4. DAN. Svoje znanje prenosi na vogošćansku omladinu u karate klubu "Sambon" Vogošća, gdje je u periodu od zadnjih 10 godina stvoreno dosta reprezentativaca i šampiona kao i uzornih učenika i studenata.
- Od 2016. godine Haris Fazlić je i član Općinskog vijeća Vogošća i aktivno uzima učešće u izgradnji bolje i naprednije Vogošće. U zadnje dvije godine Haris Fazlić se pored navedenih redovnih aktivnosti, aktivno bavi triatlonom i jedini je triatlonac s područja općine Vogošća. Triatlon je sport koji se sastoji od tri discipline: plivanje, biciklizam i trčanje. Istrčao je na desetine polumaratona, nekoliko maratona i desetine triatlona različitih distanci (sprint distanca, olimpijska distanca te poludistanca) u svim zemljama regiona pri tome predstavljajući Vogošću i BiH. 06.jula.2019. godine u austrijskom gradu Klagenfurtu, Haris će nastupiti u triatlonu svih triatlona tzv. IRONMAN triatlonu. U ovoj utrci takmičar mora preplivati 3,8 km, zatim voziti biciklo 180 km i nakon toga pretrčati 42.2 km. Takmičar mora ovo uraditi ispod vremenske granice od 17 sati. Ako uspješno završi ovu utrku ušao bi u uzak krug ljudi iz BiH (njih oko 20) koji su završili ovu ekstremnu utrku.
- Haris Fazlić je jedan od organizatora prve Vogošćanske utrke na 5 km kojom je želi da ukaže na važnost aktivnog načina života i istu je plasirao u kalendar utrka u regionu u nastojanju da privuče dosta trkača iz BiH i regiona u općinu Vogošća. Haris je oženjen i zahvalan je svojoj supruzi i porodici na podršci koju mu pružaju .

7. Volkswagen d.o.o. Sarajevo

- Fabrika je nastala 1969. godine sklapanjem partnerstva sa Volkswagenom, a saradnja je započela montažom Bube, nekadašnjeg najpoznatijeg Volkswagenovog modela. Tvornica se nalazila u Vogošći, a bila je 51% u vlasništvu UNIS-a, a 49% u vlasništvu VW-a. Procvat je doživjela sredinom 1970-ih, kada se u njoj počeo sklapati Golf. U početku Golf se sklapao od dijelova koje je Volkswagen dopremao u TAS, a sa porastom proizvodnje u izradu "jugoslavenskog" Golfa uključile su se i tvornice iz bivše Jugoslavije. Svi dijelovi za Golfa koji su proizvedeni u Jugoslaviji ispunjavali su najstrožije standarde kvaliteta, pa se Golf iz Vogošće po kvalitetu nije razlikovao od Golfa proizvedenog u Njemačkoj. Proizvodnja Golfa I je 1977. godine dostigla brojku od 5.000 automobila, a svake naredne godine proizvodnja je rasla, da bi dostigla brojku i do 15.000 vozila godišnje.
- Golf I u TAS-u proizvodio se do 1985. godine, dvije godine duže nego u Njemačkoj, a rast ove tvornice doveo je do procvata i drugih fabrika. Među njima značajne su bile tvornica auto stakala u Bosanskom Šamcu (imale su na sebi „Uniglas“ natpis), čija je godišnja proizvodnja za 100.000 automobila dostigla vrijednost od 30 miliona maraka, i „Tesla“ koji je isporučivao akumulatore u vrijednosti od 15 miliona maraka. Nakon osam godina proizvodnje prve generacije „Golfa“, krajem 1985. godine počela je proizvodnja "Golfa 2". Proizvodnja se ustalila na oko 25.000 vozila godišnje, a izvoz na osnovu kooperacije TAS-a pred rat je iznosio od 250-300 miliona maraka, uz plan da se popne na pola milijarde. 1988. godine bilo je zaposleno 3.109 radnika koji su proizveli 28.341 automobil, od kojih je 15.184 direktno bilo isporučeno Volkswagenu. Zasnovana na uspješnoj sedmogodišnjoj masovnoj proizvodnji, Volkswagen se pripremao za proizvodnju od 40.000 vozila Golf I. To je u narednoj 1989. godini skoro i ostvareno, gdje je do kraju godine proizvedeno 37.411 automobila. To je bila rekordna godina u proizvodnji Volkswagen.
- Pored Golfa u TAS-u je bila proizvodnja i modela automobila Jetta i Golf Caddy. TAS je bio jedina evropska tvornica u kojoj se proizvodila teretna izvedba Golfa I s oznakom Caddy, a koji je bio namijenjen za evropsko tržište. Prvi Golf I Caddy sa TAS-ove proizvodne trake sišao je 1982. godine i do rata 1992. godine proizvedeno je oko 200.000 primjeraka. Golf Caddy osim u Sarajevu proizvodio se i u američkoj fabrici u Pensilvaniji (Pennsylvania). Polovina ukupne proizvodnje Golfa odlazila je na slovenačko tržište, po 20% u Bosnu i Hercegovinu i Hrvatsku, a 10% proizvedenih Golfova prodavalo se u Srbiji, Crnoj Gori i Makedoniji. Automobil Golf II proizvodio se u TAS-u sve do 1992. godine kada u Bosni i Hercegovini počinju ratna dejstva, a fabrika biva prvo opljačkana, a zatim potpuno uništena. Prije izbijanja ratnih dejstava u TAS-u je bilo napravljeno nekoliko probnih primjeraka Golfa III koji nikad nije ušao u serijsku proizvodnju u sarajevskoj fabrici, upravo zbog početka rata.
- U periodu od 1992. do proljeća 1996., a tvornica i naselje Vogošća su se nalazile pod kontrolom snaga VRS. Nakon rata u pogonima nekadašnjeg TAS-a, uz pomoć Volkswagena i Škode, obavljala se najjednostavnija montaža automobila, tzv. SKD montaža. Tu su automobili u BiH stizali gotovo kompletirani u matičnim tvornicama u Njemačkoj i Češkoj. Ove godine Volkswagen slavi 50 godina postojanja.

8. Amir Bogilović

- Amir Bogilović rođen je 1953. godine na Kobiljoj Glavi, oženjen je, ima dvoje djece i petero unučadi. Amir Bogilović slovi za uglednog domaćina omiljenog u porodici i svom okruženju.
- Kao dugogodišnji uposlenik OŠ "Zajko Delić" na Kobiljoj Glavi isticao se kao vrijedan i pouzdan radnik, poštovan i cijenjen na svome poslu.
- Naročito se isticao kroz rad u džematskom odboru Adil-begove džamije na Kobiljoj Glavi.
- Također se isticao u humanitarnim aktivnostima, dobrovoljnom radu te nije propuštao priliku običi bolesne, iznemogle sugrađane te na taj način pružiti pomoć.

9. Edin ef. Mrkulić

- Edin Mrkulić, rođen je 02.06 1979. godine u Sarajevu. Oženjen i otac dva sina. Završio je Gazi Husrev-begovu medresu i Fakultet islamskih nauka u Sarajevu.
- Od 2001. godine je u službi imama, hatiba i muallima u Medžlisi IZ-Sarajevo. Pored džemata Blagovac imamsku dužnost je obavljao i u četiri Vogošćanska džemata: Gora, Hotonj, Bradići i Tihovići. Od 1. Novembra 2009. godine angažovan je u džematu Blagovac. Zajedno sa svojim džematlijama, građevinskim odborom, medžlisom IZ i općinskim službama, dao je svoj doprinos u izgradnji džamije i pratećih objekata.
- Pored rada na infrastrukturi najveći uspjesi u imamskom, hatibskom i muallimskom radu vezani su za mekteb i mektebsku nastavu. Polaznici mekteba učestvuju na raznim takmičenjima i u proteklom periodu ostvarili su značajne rezultate, te su na najbolji mogući način predstavljali svoj džemat i općinu Vogošća. Neki od značajnijih uspjeha polaznika mekteba i njihovog muallima Edin ef. Mrkulića na Blagovcu su:
 - 1. mjesto 2016. godine u kategoriji Kiraet – mlađi uzrast na nivou Medžlisa Islamske zajednice Sarajevo.
 - 1. mjesto 2016. godine u kategoriji Kiraet – mlađi uzrast na nivou muftijstva Sarajevskog
 - 1. mjesto 2016. godine u kategoriji Kiraet – mlađi uzrast na nivou Rijasetu Islamske zajednice u BiH.
 - 2. mjesto 2018. godine u kategoriji Kiraet – stariji uzrast na nivou Medžlisa Islamske zajednice Sarajevo.
 - 3. mjesto 2019. godine u kategoriji Kiraet – stariji uzrast na nivou Medžlisa Islamske zajednice Sarajevo, predstavnik na svim takmičenjima bio je polaznik mekteba Dindić Humejd.U sportskim takmičenjima ostvareni su zapaženi rezultati u malom fudbalu.
 - 2. mjesto 2016. godine u okviru mektebske lige u malom fudbalu na nivou Medžlisa Islamske zajednice Sarajevo.
 - 3. mjesto 2015. godine u okviru mektebske lige u malom fudbalu na nivou Medžlisa Islamske zajednice Sarajevo.
- U mekteb na Blagovcu 2018/2019 godine upisano je 153 djece. Na osnovu svih rezultata na takmičenjima u prethodnom periodu, mekteb na Blagovcu je svrstan među deset najboljih mekteba na području Medžlisa islamske zajednice Sarajevo. Pored rada sa djecom, djeluje i omladinski sektor džemata kojeg čini tridesetak članova koji raznim projektima nastoje biti od koristi džematlijama i džematu u svim njegovim aktivnostima. Iako jedan od najmlađih džemata na općini Vogošća, džemat Blagovac postao je mjesto okupljanja velikog broja vjernika, djece i omladine.

10. Haris Čutahija

- Haris Čutahija je preko petnaest godina bio aktivni učesnik javnog i političkog života Vogošće i svoj doprinos za razvoj civilnog društva dao je kroz dva mandata u Komisiji za ljudska prava, mlade i ravnopravnost spolova Općinskog vijeća Vogošća gdje je bio inicijator formiranja Vijeća mladih prije nego što je to zakon propisao. Bio je član i Općinske izborne komisije kao i više radnih tijela Općine.
- Profilisao se i kroz rad u mnogim udruženjima u Vogošći, kao što su Centar za razvoj omladinskog aktivizma, Asocijacija mladih Vogošća i Udruženja Demos. Desetak godina je član upravnih tijela Košarkaškog kluba Vogošća, a dugo je bio i generalni sekretar Šahovskog kluba Vogošća.
- Predstavlja svoju matičnu općinu u najboljem svijetlu i kroz svoj višegodišnji angažman u najstarijoj evropskoj organizaciji, Panevropskoj uniji i na raznim konferencijama širom Evrope. Zadnjih godina, kao savjetnik predsjednika, predsjednik, te generalni sekretar Panevropske unije Bosne i Hercegovine, uvijek je koristio priliku da promovise Vogošću, što je rezultiralo i prošlogodišnjom međunarodnom konferencijom koja je održana u Vogošći, na kojoj je bilo oko stotinu mladih iz cijele Bosne i Hercegovine i regije. Osim toga, cijenjen je kolumnista više portala, uključujući buka.com.
- Sa svojih trideset i pet godina postigao je mnoge uspjehe u karijeri i obrazovanju i kao takav, pozitivno je prezentovao našu općinu u cijeloj Evropi i treba biti primjer mnogim mladim ljudima.

11. Ernad Šahović

- Ernad Šahović rođen je 18.12.2005. godine u Vogošći i učenik je OŠ „Mirsad Prnjavorac“ u Vogošći.
- Trenira boks u BK „Vogošća“ od 2015. godine. Za četiri godine koliko trenira boks, nikada nije doživio poraz. U dosadašnjih 20 mečeva ima 18 pobjeda i 2 nerješena meča. U tih 18 pobjeda su 3 titule prvaka Federacije BiH i 3 titule prvaka Bosne i Hercegovine. Ima jednu pobjedu na međunarodnom takmičenju, gdje je njegova borba proglašena za najborbeniju. Dva puta je proglašavan za najboljeg takmičara svih uzrasta i kategorija pionira u 2016. i 2017. godini. Učestvovao je u osvajanju ekipne šampionske titule Prve lige Federacije gdje je ostvario 8 pobjeda u 8 mečeva. Trenutno je u ekipi školaraca gdje je proglašen za najboljeg školarca, a BK „Vogošća“ je osvojila prvu ekipnu titulu za školare.